

ԸՆՏՐՈՒԹԻՒՆՆԵՐԸ ԵՒ ԱՆԿԱՍԱԶՆՈՒԹԻՒՆԸ

Posted on February 27, 2013 by Keghart

keghart.com

Category: [Opinions](#)



Կատարուած ընտրութիւնները մեզի մտածել կու տան կարգ մը հարցերու շուրջ:

ա.- Ընտրութիւններէն քանի մը ամիս առաջ հրապարակ նետուեցաւ լուրջ յաւակնորդ հանդիսացող նախագահական հաւանական թեկնածու, նախկին Արտգործ նախարար Վարդան Ոսկանեանի դէմ ենթադրեալ չարաշահումի պարագան՝ կապուած CIVILITAS-ի հետ, որուն պատճառաւ Պրն. Վ. Ոսկանեան քաշուեցաւ մրցասպարէզէն:

բ.- Ընտրութեան նախորդող օրերուն մահափորձի ենթարկուեցաւ նախագահական թեկնածու Պարոյր Հայրիկեան, յուզումի ու վախի ալիքի մը տարածման պատճառ ըլլալով երկրէն ներս:

գ.- Երիտասարդութիւնը ընդհանրապէս եւ ուսանողութեան գործօն տարրը ի նպաստ Ռ. Յովհաննիսեանին էր, իսկ Ս. Սարգսեանի հանդէպ լեցուած էր անվստահութեան զգացումով:

դ.- օSCE/ODIHR կը յանձնարարէր աւելի խիստ պատժամիջոցներու դիմել ընտրակեղծիքներ գործադրողներու եւ անոնց «ճարտարապետներուն» հանդէպ:

ե.- Ընդդիմադիր (հակա-Սարգսեանականներ) ջաջողեցան համաձայնիլ մէկ թեկնածուի շուրջ՝ իրենց մէջ հին եւ նոր տարակարծութիւններու կամ նախկին վիրաւորանքներէ ձերբազատուած չըլլալու պատճառաւ:

զ.- Ամենայն Հայոց Կաթողիկոսութիւնը, Մեծի Տանն Կիլիկիոյ Կաթողիկոսութիւնն ու Հայկական Բարեգործական Ընդհանուր Միութիւնը դիրքորոշուած էին ի նպաստ Ս. Սարգսեանին եւ եղան առաջին շնորհաւորողներէն:

է.- Սոցիալ Դեմոկրատ Հնչակեան Կուսակցութիւնն ու Ռամկավար Ազատական Կուսակցութիւնը ընտրութենէն արդէն շաբաթ մը առաջ սատար կը կենային Ս. Սարգսեանին՝ հակառակ մամուլով իրենց հրապարակած բազմաթիւ ակնկալութիւններուն եւ սպասելիքներուն:

ը.- Անվստահութեան հսկայ ալիք մը բարձրացած էր միջազգային դէտերու կատարած գործին եւ անոնց արտայայտութիւններուն հանդէպ:

Նախագահական այս ընտրութիւնը եկաւ անգամ մը եւս ցոյց տալու թէ Հայաստանի իշխանութիւնները տակաւին շատ հեռու են ժողովրդավարութենէ ու թափանցիկութենէ: Անգամ մը եւս պարզուեցաւ թէ իշխող վերնախաւը, յատկապէս սակաւապետութիւնը (օլիգարխները), յամառօրէն ու անզիջող կերպով կ'ուզեն պահել այս իշխանութիւնը: Ամենէն մտահոգիչը, ի հարկէ, հայ ժողովուրդի բեւեռացումն է եւ անվստահութեան մթնոլորտը ներկայի իշխանութիւններուն եւ վերնախաւին հանդէպ (որ ձեռնտու է կարգ մը ներքին ու արտաքին ոյժերու):

